

rhosum mit einem Schlag Wasser vmbgebracht/ vnd dieses war notorium, da zohet er die Pfeiffen ein/ denn er gedachte/ wenn man die Chymicos des Landes verweisen solte/ so müsten die Empyrici gar gehentet werden/ denn er sahe wol/ daß ihm der Meid aus den Augen heraus sahe/ vnd jedermann solches mercken konte/ aber der Fürst achtete solches Aufschneidens wenig/ vnd brauchte nichts desto weniger die medicamenta Chymica gerne. Aber solche Ehren-Diebe vnd vnerfahrene Gesellen solten billig bedencken/ quod non usus sed abusus rei substantiam collac: Aber es gehet sekund in der Welt hund vnd seltsam daher/ vnd fragen ihrer wenig darnach/ wenn sie gleich durch solche calumnien ein böses Gewissen erlangen/ sie hengen es dieweil an einen starcken Nagel in einem finstern Winkel/ vnd müsten die gelehrten vnd erfahrenen Chymici jetziger Zeit viel erdulden/ aber dieses ist nichts Neues/ denn das Schänden vnd Schmähen Momus mit aus der Höllen gebracht/ vñ wird auch wol bleiben biß an der Welt Ende/ doch werden endlichen solche Lästerer sehen/ in welchen sie gestochen haben/ vnd ist zu seiner Zeit solches dem Democrito, welcher gar vor einen Narren vnd unsinnig gehalten worden/ Apollonio, Palingenio, Comiti Mirandulano vnd andern mehr wiederfahren/ die Zeit wird doch die Wahrheit hervor bringen/ vnd wenn einer von dem Vitriolo kein einiges experimentum mehr hätte/ als dieses/ welches ich an dem geschwollenen Bettel-Buben zu Wien gesehen vnd erzählet/ so were es vberflüssig genug/ vnd were unwiederleglich zu schliessen/ daß eine gewaltige Macht vnd Tugend in diesem Subiecto müsse verborgen liegen.

Wil derowegen alle Scrutatores hujus divinæ artis & scientiæ vermahnet haben/ sie wollen dieses Subjectum fleissig in acht nehmen/ daß selbe wol anatomirn, sein innerstes vñ verborgenes heraus lehren/ ich wil sie versichern/ sie werden nicht vmbsonst arbeiten/ vnd sich nicht abschrecken lassen/ ob schon viel Zeit vnd Mühe darauff gehet/ der Zukosten ist das wenigste/ der wird auch gar reichlichen davon bezahlet werden/ wofern man den Kern nur recht heraus bringet/ Aber es bedarff keines Vermahnens/ Verständige werden der Sachen wol Rath zu schaffen wissen.

In Epilepsiâ.]

Von der præparation Vitrioli schreiben Qvercetanus, Hartmannus,